

Wujudkan kawasan industri mesra alam

Mohamad Fazrul Abdul Majid

MERLIMAU - Pembukaan kawasan industri baharu di negeri ini perlu membudayakan dan mempraktikkan penggunaan teknologi baharu berkonsepkan mesra alam.

Exco Kanan Perumahan, Kerajaan Tempatan, Saliran, Perubahan Iklim dan Pengurusan Bencana negeri, Datuk Rais Yasin berkata, perkara itu perlu menjadi fokus utama dalam mengelakkan sebarang isu pencemaran, sekali gus memastikan kelestarian alam semula jadi terus terpelihara.

Katanya, dalam hasrat menuju ke arah Bandar Pintar atau Smart City, penggunaan teknologi terkini dan teknologi hijau menjadi antara perkara yang akan diberi penekanan oleh Kerajaan Negeri.

"Penggunaan teknologi baharu seperti 'Smart Bin' yang menggunakan sensor Internet of Things (IoT) antara yang sedang kita bincangkan dalam memastikan pembuangan sisa domestik mahupun sisa komersial lebih efisien di negeri ini.

"Ini antara contoh yang sedang kita lihat dan kita



RAIS menyempurnakan gimik perasmian Sambutan Hari Alam Sekitar Negara 2023 Peringkat Negeri Melaka di Politeknik Merlimau Melaka.

harap semua pihak dapat memberi kerjasama untuk menjayakan inisiatif demi kelestarian alam sekitar di negeri ini," katanya.

Beliau berkata demikian pada sidang media selepas merasmikan Sambutan Hari Alam Sekitar Negara 2023 Peringkat Negeri Melaka di

Politeknik Merlimau Melaka, di sini, pada Sabtu.

Hadir sama, Pegawai Daerah Jasin Datuk Rahizi Ranom; Pengarah Jabatan

Alam Sekitar Negeri Melaka Rosli Mustafa; Ketua Pegawai Eksekutif Perbadanan Teknologi Hijau Melaka (PTHM) Ismail Hasim dan

Pengarah Perbadanan Pengurusan Sisa Pepejal dan Pembersihan Awam (SWCorp) Melaka Khairuladha Ab Mutalib.

Dalam memastikan alam sekitar kekal terpelihara, Rais memaklumkan pihaknya bersama agensi berkaitan sedang dalam usaha ke arah mendidik rakyat Melaka melakukan pengasingan sisa pepejal dari rumah.

"Oleh sebab itu, saya minta agensi dan jabatan kerajaan terlibat seperti Jabatan Alam Sekitar, Perbadanan Teknologi Hijau Melaka (PTHM), Perbadanan Pengurusan Sisa Pepejal dan Pembersihan Awam (SWCorp) dan pihak berkuasa tempatan (PBT) untuk bekerjasama dengan badan bukan kerajaan (NGO) untuk memastikan rakyat tahu melakukan pengasingan sisa dari rumah.

"Ini penting supaya semua tahu tanggungjawab menjaga alam sekitar terletak di bahu kita semua.

"Bagaimanapun Kerajaan Negeri belum bercadang menguatkuasakan arahan pengasingan tersebut, sebaliknya menggunakan pendekatan lebih mesra dengan mendidik masyarakat terlebih dahulu," katanya.